

李氏續焚書

李氏續焚書卷之三

讀史彙

○○○陳靜誠

夫子曰不在其位不謀其政此常理也。然世間固有謀其政而不在其位者。則常理之所未有。從古之所未有。而於靜誠陳公僅見之矣。後此若姚恭靖亦可謂能處身於遇王之際者。而戀戀一少師之榮。終身役役于殿陛而不肯去。則亦稍優于劉誠意而已。其視公不大遠乎。嗚呼。胡惟庸之藥不

待嘗也。天官之九級，不待歷歷下上也。故吾以陳靜誠謂我朝名臣之第一人也。

○○劉伯溫

公中忌者之毒，以太直故。晚而上之顧寢薄，以太剛故。其不肯爲子房之和光同塵，曲直藏身明矣。此其人品識見實居留侯之前而世人惑于聞見，反以公爲不逮子房，非也。一進一退，自有定數。一勝一負，自有定時。而沉於生死大事也，迷者俟命而行，達人知天已定。公旣精曉天

又安有不知已之死日在洪武八年而已死之年
僅六十又五也。今觀公之封天、文、秘書以授子璉
也。且責令璉亟上之矣。又爲書以授次子仲璟而
曰：必待惟庸敗後乃可密聞。至十三年。

上竟誅惟庸。累坐夷滅者數萬。果思公言。召璉拜官。
而璉遂卒。孫薦繼之襲封。誠意伯增祿五百石。且
予世公一時剛直之所貽。不可以觀乎。而仲璟復
奏公遺疏拜閣門使。璉與薦咸卒于洪武二十五
年之前。而仲璟獨著節於靖難之後。公爲開

國功臣仲環爲死難忠臣世濟其直剛終難屈孰謂
公之獨授書于仲環也爲無意我故曰皆天也公
唯知天而已不然何貴於知天文

○○○宋景濂

上問公何以不受乞文之餽公對曰天朝侍從受小
夷金非所以崇

國體予謂公失對矣公不宐待問而後對也方請文
時公卽宐疏列其事言屬國遣使求文湏奏請天

朝待

皇上允許勅令某臣撰作乃敢作臣等既奉勅而後撰文則日本必不可以有所餽而得文也若受其餽卽爲私交願

聖上頒降撰文而令來使賁還所餽之金如此則朝廷尊嚴小國懷畏

聖上必且大喜矣而公何不知也予觀

上之曲宴公嘗歎曰純臣哉爾濂今四夷皆知卿名卿自愛嗚呼危哉斯歎芒刺真若在背而公又尚不知何也已告老而歸仍請歲歲入朝欲以醉學

士而奉魚水此其意不過爲子孫宗族世世光寵計耳愛子孫之念太殷也孫愷情勢作威坐法自累則公實累之矣且并累公則亦公之自累非孫愷能累公也使旣歸而卽杜門作浦江叟不令一人隸于仕籍孫輩亦何由而犯法乎蓋公徒知溫室之樹不可對而不知殺身之禍固隱于魚水而不在干溫樹也俗儒不知止足之戒徒守古語以爲法程七十餘歲死葬夔峽哀哉

○李善長

李善長安敗望蕭鄧侯哉特其一時同起豐沛跡
相類耳漢祖百戰以取天下年年遠征乃令鄧侯
獨守關中數千里給餉增兵不絕厥功大矣且日
夜惶惶恐一言不合一舉措不慎卒無以當上心
係首領最後僅僅爲民請上林空地片語稍拂上
意然亦有何罪而遂致械繫略不念故人勲舊之
情也誰謂漢祖寬仁大度者吾以謂必如我
太祖乃可稱寬仁大度也夫君逸臣勞理也亦勢也
我

二祖之勤勞不敢自暇逸三十一年如一日二十二
年如一季者也昔之治天下於有天下之後者曾
有若是者邪

二祖之勤勞以治天下如此故亦望人之輔之也亦
不顧家顧親戚而爲之也而善長諸臣無有一人
能體其心者今觀歐陽駙馬所尚者

太后親生公主也一犯茶禁卽置極典雖
太后亦不敢勸其不私親以爲天下榜樣亦大昭揭
明白矣善長等到此時豈猶未知

太祖之心邪善長若猶未知

太祖之心而又何望于善長之弟與善長之姪若孫
若親戚奴僕等邪今善長且已屢致論列矣猶眷
戀崇貴顯要不忍請老何也年已七十有七方且
揚揚然借兵夫起大第以明得意嗚呼一介草茅
當四十一歲時救死且不暇於今何如也而猶以
爲未足邪得自經死牖下千幸且萬幸何足憐哉
曰設身處地當如何曰當漢祖大封功臣之日何
乃三傑中人材亦只封文終侯未嘗敢與韓彭等

埒也。我又何人。偃然而徑據于中山王之上乎。百
頓首力辭。封甘心退讓。自處於剝誠意之下。則
帝必喜。且夫歲入祿米五千餘石。何人不贍了也。推
其半以分給叔兄弟姪宗黨交朋。母使一人與職
任事。得以怙勢作威。福則怨矣。自生禍。從何至是。
謂損福以滅禍。滅福以致禍。此天之道而人之事
也。若王國用之。疏自妙。然以之陳於我
太祖之前。揔是隔靴搔癢。

○荏將軍

花將軍旣死，郤夫人安得獨完？然能知花將軍之不可無後，孫侍兒之決可託子，則其獨具隻眼爲何如也？嗚呼！郤氏往矣，孫氏而後其苦可知也。付託在躬，雖明知生不如死，而有口亦難說矣。吾以爲孫氏可敬也。嗚呼！在天爲風雲，在地爲雷雨，死則爲雷，老生則爲花雲，總則一人而已，而又何怪邪？

○韓成

紀信誑楚，楚滅漢興，天下旣定，恤典何曾嗚呼？此

漢祖基業所以僅僅四百餘載也韓成誼漢照映
今古惟

帝念哉刻骨痛苦嗚呼此

太祖高皇帝之業所以歷萬億載而未有艾也同時
死事鄱湖三十六將如丁普郎者首已斷矣猶執
刀船頭若戰鬪狀一何忠且勇也然

帝終以成効忠致死言念不忘封成高陽侯廟祀康
邱山位若首嗚呼愛賢樂士視人猶已一時英傑
無不樂爲之死也空也而說者猶以一二功臣不

終之故大爲

帝疑不知

帝之體念諸功臣也。亦已無所不至矣。而諸功臣則未必能一一仰體之也。誰其得似中山與開平又誰其似西平與信國乎其爲高皇終始眷注何如也。

○馮勝

馮勝以大將軍統數十萬衆出沙漠平定反側爲聖天子伸威萬里之外糧餉不計死亡勿恤唯惓惓

以不虜掠不擾害爲言此爲何等事而我爲何等
人乎而敢娶元妃以自肆私夷財以自利也吾謂
不卽梟首已爲大幸乃猶以爲可侯吾不知之矣
且我

朝

聖祖於凡有功諸臣賞賚原不薄體悉原無所不至
也我

聖祖起滁陽入建業定江南以至定山東定河南北
凡十有餘歲始卽帝位及卽位又享國三十有一

年此蓋上帝之所篤生天固縱之使多歷年所歟
福壽我黎民原非漢唐宋首創諸君假仁義以行
者之所得比也竝時惟湯信國壽躋七十餘俱不
及則至於靖難之世又安得有故將乎未可遽以
是而遂爲不惜才者之憾吾以爲最惜才者當無
如我明

太祖矣

○○○羅義

此衛卒見識勝方正學十倍人亦何必多讀書哉

李日縉步書 卷三
嗚呼以全盛之天下金湯之世界付與講究周禮
精熟大學衍義之大學士不四年而遂敗可畏哉
書也

○死難諸人

此或爲補鍋匠或爲何西傭或爲轉輪藏頂之二
十餘人嘍嘍有聲者皆未可知也大臣主事禍
國一至此哉絕可悲歎黃子澄齊太輩雖寸斬亦
終不足以謝天下矣

高公雖與程公同邑相善但高貴死忠程貴智免此兩公所以自謂不同也然高欲死忠固也若程者判以其身從君逃難至滿數十載其忘家忘親忘身之忠又如此固人臣之大忠也何得自以爲不同也夫一以殺身爲忠反使族屬之親祖考之骨亦不得免一以智術爲忠乃能致其

主脫走逍遙于物外老途歸闕還葬西山是何心之最忠慮之最遠所全最大也嗚呼吾願世之爲臣子者心最忠而世卒莫能知以是爲忠之大云

卷三
○劉璟王紳

王忠文之子若孫、真忠文之子孫也。劉誠意之子、
真誠意伯之子也。快人哉！余獨怪誠意善天文、知
難星正過、急勸

上登別舟、以免而不知、已之難星在胡惟庸頭上、來
何也？豈老星官亦但能知人、而不能自知邪？要之
總不若姚恭靖老禿卒、以僧錄司善世終其身、我
見其十六年於
朝、隨班行禮、賜出宮、人不辭、亦不近、瑩然一比丘。

以故絕無免死狗烹之疑又何泛舟五湖與夫勞
勞攘攘欲從赤松子學辟穀事乎意者必如姚而
後可稱善始善終而善於天文乎

○胡忠安

胡忠安之忠大矣當未樂在位之二年猶未放心
於

建文之遜去而所托腹心之臣惟忠安一人孰知忠
安一日在湖湘則

建文一日得安穩于滇粵諸山寺邪畱一

建文固無損于事。求樂之忠而反足以結
文皇之寵完。君父叔姪之倫。今觀公之告
文皇。直言其無足慮而已。嗚呼。誠哉其無足慮也。公
豈欺

文皇者哉

上疑始釋

建文無恙。吾故以謂胡忠安之忠大矣。

姚恭靖

公官太子少師推忠輔

國協謀宣力文臣。隨封進榮祿大夫勳柱國追封榮國公諡恭靖加贈少師別號獨菴老人又自謂逃虛子。予時年七十五矣。偶至燕寓西山極樂寺訪問公遺書遺像甚勤。適有告者曰。公自輟配享祀大興隆寺。而今燹矣。今移公像于崇國西偏。甚不稱。予齋戒擇日晨往。崇國寺瞻禮。見墨蹟宛然。儼有生氣。俯仰慨慕。欲涕者久之。以爲我國家二百餘年以來休養生息。遂至今日士安于飽煖。人忘其戰爭。皆我

成祖文皇帝與姚少師之力也。而其可如此苟簡棄
置之哉。而其可如此苟簡棄置之哉。公像甚精峭。
上有題偈。乃公親筆。若以爲古物。亦當守爲世寶。
況真儀乎。意欲移住崇國寺。朝夕瞻拜。以致皈依。
縱在世不久。亦愈于空抱遺恨也。公有書名道餘
錄。絕可觀。漕河尚書劉東星。不知于何處索得之。
空再梓行。以資道力。開出世法眼。

○岳正

楊遂菴雖以葉文莊壙誌爲未詳。以太白柳州比

擬爲非類以金緋在躬爲非所以幸先生字字皆
滴血可畏也然文莊壙誌亦自爲定并錄讀之又
責李文正補傳成於三十年後其言尤爲真切嗚
呼世間白日如過隙誰能耐煩等尔一落筆遂三
十年也然文正祭文等皆淋漓可誦有欲知蒙泉
岳先生者定當細閱文正先生之筆文正真不謬
爲岳先生門下士與佳壻也其壻經其女甥壻辰
祭文亦好且道二人皆是岳先生自幼選擇而成
者豈不快哉

○○李賢

既已食君之祿，官居一品，君命起復，卽安不俟駕行矣，不必怪東怪西，謂彭華嗾使羅倫以代公，未白反使羅倫亦蒙不韙之名也。余謂若欲盡孝，自不容出仕，既出仕，藉君養親，又持終喪之說以買名，皆無廉恥之甚者。苟在朝，不受俸，不與慶賀，不穿吉服，日間入公門，理政事，早晚焚香哭臨，何曾失了孝道？況忠以事君，敬以體國，委身以報主，忘私忘家，又忘身，正孝之大者，乃反以爲不孝，可歎。

天順反正八年之間非文達逞身負荷則曹石之徒依然敗壞潰裂不可收拾矣何莫而非文達行孝去處而必以區區廬墓哭泣乃爲孝邪吾不知之矣

○李東陽

此段亦是一大議論但當時洛陽爲首相其識見亦只是夢陽等雖文正爲次輔亦不敢與之商量萬全之策況韓文九卿諸公哉故謂當時諸老盡出一時擊搏之習無一人能爲朝廷計久遠圖萬

全者可也。謂其咸相隨而就夢陽之後不可也。文正雖以才學知夢陽。然夢陽實不知文正。使其能知文正。一兩分則文正不孤矣。何待結識新都。倚託梁費而後致身以去邪。故知爲文正者實難。後之學者。慎勿容易草草論文正。

○○○楊廷和

世廟初八。據古執禮。公當其時。可謂正直不阿。卓然名世矣。是豈賂瑾賣友取容之人乎。此市井之談。愛憎之口。不待辨者。獨大禮議起。人皆是張桂而

而非公予謂公只是未脫見聞窠臼耳若其一念
唯恐陷主于非禮則精忠貫日可物也故謂公之
議有所未當則可謂公之心有一毫不忘則不可
此趙文肅所以極力爲公表也善乎鄭淡泉之論
曰康陵時劉公鞠躬盡瘁以匡其始楊公撥亂反
正以扶其終或去或不去均之爲大臣其言當矣
果如或者之說於司直爲賣友于劉瑾爲阿勢則
大禮之議委曲扶同公自優爲之矣然公之議大
禮也可以許其忠而未敢以許其妙若處

康陵之朝非但人不知其妙而亦不能信其忠蓋大
忠者不見忠至妙者人自然不知其妙也是以當
時知公者僅僅有李文正梁文康費文憲數人耳
文正必得公而後敢以去梁費二公亦必得公而
後敢卽安則公所係何如哉予又怪其不能以事
康陵者而事

永陵也豈其真挾定冊之功或恃
世宗仁聖終能聽已也邪不知之矣

卽此一事公之才識已足蓋當世矣當是時人之
尊信朱夫子猶夫子也而能識知朱子之非夫子
唯陽明之學乃真夫子則其識見爲何如者然有
識而才不充膽不足則亦不敢遽排衆好奪時論
而遂皈依龍場以驛丞爲師也官爲提學而率諸
生以師驛宰奇亦甚矣見何超絕志何峻卓況不
虞賊瑾之虐其後乎

○○王驥

弇州謂靖遠材而欲武略則優噫安得有大將之

才如驥又得無欲如弇州言者而用之使之爲我
禦虜征蠻以封侯乎然旣無欲矣則雖封侯亦其
所不欲者吾又安能使之捨弃性命以爲我征蠻
禦虜而與其所不欲之侯封也其言謬矣然其曰
靖遠差寬不然以麓川三大役塗炭幾天下半而
卒以長世此則稍有識見非復彼時訓導諸人疏
語夫國家用人唯用其才今乃使有才者不得用
卒自讒于中貴人有援力者以自見其爲宰相冢
宰本兵吾謂其慚汗滿面愧死無地矣乃反以有

欲病人何哉又何必干居要路者爲也我

朝文臣世爵今唯靖遠猶存故弇州獨以爲仁德
之報不信彼讒妬之口云然王越楊善爵安可以不復祿又安可以不世也世王越楊善之爵祿則
人才自然思奮又何必以臨時乏才爲恨邪

○○楊善

唯

景泰絕無迎

太上皇之意是以

太上皇自不待迎而後至豈

景泰君臣當時真能寓有意于無意之中而若是吊

詭與則

南宮不錮

太子不廢門不假奪矣惜哉終始一無意思之人耳
乃也先反因之以奸來歸以戕害我兄弟君臣是
真爲有意而送之來歸也非果楊善之能也也先
爲巧而我爲拙也先爲主而我爲賓不亦大不如
人矣乎雖然事勢至此社稷爲重君爲輕身又爲

輕焉者也。于忠肅之功，千載不可誣也。故論社稷功，則于謙爲首論歸太。上皇功，則楊善爲最。然則楊善，其真有意之人哉。故能以無意得之。

○○○王文成

陽明先生在江西，與孫許同時，則爲江西三忠臣。先生又與胡端敏、孫忠烈同舉鄉薦，曾聞夜半時有巨人文場東西立，大言曰：「三人好作事，已忽不見。」則在浙江，又爲三大人矣。且夫古之立大功者，

亦誠多有但未有旬日之間不待請兵請糧而卽擒反者此唯先生能之然古今亦未有失一

朝廷卽時有一

朝廷若不見有

朝廷爲胡虜所留者舉

朝晏然三邊晏然大同城不得入居庸城不得入卽至通州城下亦如無有此則于少保之勲千載所不可誣也若

英宗北狩楊善徒千片言單詞歡喜也先遂令也先

卽時遣人隨善護送

上皇來歸以予觀之古唯廝養卒今僅有楊善耳吁以善視養卒則養卒又不足言矣此皆今古大功未易指屈則先生與子與楊又爲千古三大功臣焉者也嗚呼天生先生豈易也邪在江西爲三大忠在浙江爲三大人在今古爲三大功而況理學又足繼孔聖之統者哉

○王晉溪

弇州謂晉溪公貪財好睚眦中人夫滿朝皆受宸

濠賂獨晉溪公與梁公亡有也楊廷和爲首相受
宸濠賂擅與護衛乃駕禍于梁公而梁公不辨卒
被劾去又駕禍于晉溪公又不辨卒被誣
下獄論死是孰爲貪財乎孰爲好睚眦人乎嗚呼
晉溪不貪宸濠之賂而陰用守仁使居上流以擒
濠明知守仁不以一錢與人不與一面相識而故
委心用之篤也少具眼者自當了了何況弇州素
讀書作文人邪彼不拒江彬者欲以行彼志耳是
以能使守仁等諸大豪傑士得爲

朝廷用也當時若李兄嗣之撫應天喬宇輩之居
南京陳金等之節制兩廣卒令宸濠旋起而旋滅
是誰之功乎嗚呼此唯可與智者道

○儲瓘

公視陽明先生居然前輩矣陽明中弘治十二年
進士時公則已太僕少卿而往來問學若弟子吁
此公之所以益不可及也後泰州有心齋先生其
聞風而興者與心齋之子東崖公贊之師東崖之
學實出自庭訓然心齋先生在日親遣之事龍谿

于越東與龍谿之友月泉老衲矣所得更深遠也
東崖幼時親見陽明

隋閣古事

○裴耀卿疏救楊濟坐賊免笞辱准折贖
賊官死且不怕况怕杖乎清官寧可受死肯受辱乎
然則決杖贖死正所以優待賊官而導之賊汚也雖
曰士人實同徒隸但論有賊否耳徒隸之人豈無羞
耻本心高出士人之上哉

○子汲子壽

假與壽所謂視死如歸以死爲榮者耶假壽皆宜公
子而壽又朔同母子若說父母種性不應產此聖兄
聖弟明矣人固不係於種類哉雖惡種其能移此二
子至孝至友之真性哉

○○○衛玠問夢

周禮六夢曰正夢曰噩夢曰思夢曰寤夢曰喜夢曰
懼夢東坡夢齋銘曰人有牧羊而復者因羊而念馬
因馬而念車因車而念菰遂夢曲蓋鼓吹身爲王公
夫牧羊之與王公亦遠矣想之所因豈足怪乎李溫

陵曰。周公樂令蘇子。皆一偏之談。推測之見。青天白日。各自說夢。不足信也。無時不夢。無刻不夢。天以春夏秋冬。夢地以山川土石。夢人以六根六塵十二處十八界。夢死夢生。夢苦夢樂。飛者夢於林。躍者夢於淵。夢固夢也。醒亦夢也。蓋無時不是夢矣。誰能知其因乎。雖至聖至神。於此無逃避。夢中若問其因。亦當縮首卷舌。不敢出聲矣。善哉。衛玠形神所不接之問也。使得遭遇達磨諸祖。豈不超然夢覺之關。而何止差疾已也。惜哉。好學而無其師。真令人恨恨。

○庾公不遣的盧

不豪則自不達，不達則自非豪。唯達故豪，一也。但世有慕名作達者，似達而非達，亦有效顰爲達者。唯達亦不達。庾公之不遣的盧也，曰：昔孫叔敖殺兩頭蛇，以爲後人效之，不亦達乎？方叔敖少時，寧知殺兩頭蛇之爲達而後殺之耶？自必死，故歸而向其母泣，唯自必死，故寧我見之而死，不欲後人復見之而死。也是之爲真達也。遂從而殺之，是之爲真豪也。彼豈有心倣效，甚人來耶？是故阮渾欲學達而嗣宗不

許惡其效也。山公之薦咸曰：清真寡欲，萬物不能移也。使在官人之職，必妙絕於時，識其真也。噫，是豈易與講道學者談耶？

○史魚禽息

二子皆死諫，二子皆迂腐。朕二子之所以痛百里奚、蘧伯玉者，至矣。所以知百里奚、蘧伯玉者，深矣。易曰：二人同心，其利斷金。蓋二人不用於世，二子之目不瞑也。與其知二人而不用，不如用二人而身死也。惜才如此，何死生之可言乎？金雖堅，安足斷耶？嗚呼，世

有貞友而不可以事君者也故求忠臣者尤必之
貞友之間

○○孔融有自狀之性

自狀之性乃是自狀真道學也豈講道學者所能學
乎既不能學又冒引聖言以自揜其不能視融之六
歲便能藏張儉長來便能作書救盛孝章薦禰正平
必以不曉事目之矣嗟乎有利於已而欲時時囑託
公事則必稱引萬物一體之說有損於已而欲遠怨
避嫌則必稱引明哲保身之說使明天子賢宰相燭

知其奸欲杜此術但不許囑託不許遠嫌又不許稱引古語則道學之術窮矣

○其思華子

此華子之所以賢也當其時三人皆赴楚幸而同會於赴楚之途不幸而同風雪於嶽巖之間積日過時無所食飲或不柰饑之與寒遂病以死華子蓋幸而得不死者也幸而不死而得以見楚王楚王能饗之未必能用之縱能用未必遽以爲相錫以千金其身之未敢必其爲如何也而況使王澤及其子乎吾

此下遺漏一百三十字，俟訪樣本續刊。

三卷終

李氏續來書

卷三

三十三

李氏續焚書卷之四

雜著彙

○東土達磨

東土初祖卽西天第二十八祖菩提達磨尊者。自西天來東。單傳直指明心見性。直了成佛之旨。以授慧可。遂爲東土初祖。蓋在西天則爲二十八代尊者。相傳衣鉢之祖。所謂繼往聖之聖人也。猶未爲難也。在此方則爲東土第一代祖師之祖。所謂開來學之聖人也。難之尤難焉者也。嗚呼絕言忘句玄酒太羹。千

孫千億沿流不絕爲法忘軀可謂知所重矣

釋迦佛後

釋迦佛說法四十九年畢竟不曾留一字與迦葉其與達磨東來不立文字蓋千載同一致也迦葉無故翻令阿難結集遂成三藏教語流毒萬世嗟夫釋迦傳衣不傳法傳與補處菩薩者衣也非法也傳衣者傳補處傳補處者蓋合萬億劫以爲一劫合萬億世以爲一世又非止於千孫相繼以爲一世者之比也此其識見度量爲何如哉予偶來齊上乘興嘗謂

夫子廟登杏壇入林中是檜栢參天飛鳥不敢棲止
一草一木皆可培植而莖數刺草不生棘木不長豈
聖人之聖真能使草木皆香潔鳥鵲不敢入林窠噉
哉至德在躬山川效靈鬼神自然呵護庸夫俗子無
識不信獨不曾履其地乎何無目之甚也夫
孔夫子去今二千餘歲矣

孔氏子姓安坐而享

孔聖人之澤况鯉也爲之子伋也爲之孫纁纁三墳
俎豆相望歷周秦漢唐元以至今日其或繼今者

萬億劫可知也蓋

大聖人之識見度量總若此矣而又何羨于佛與釋
迦乎元黨懷英有詩云魯國餘蹤墮渺茫獨遺林廟
歷城荒梅梁分曙霞棲影松牖迴春月駐光古柏嘗
霑周雨露斷碑猶載漢文章不須更問傳家事泰岱
參天汶泗長至矣哉空自思惟孰與周秦漢唐宋元
長且久也

○書胡笳十八拍後

此皆蔡伯喈之女所作也流離鄙賤朝漢暮老雖

世才學亦何足道。余故詳錄以示學者。見生世之苦。如此欲無入而不自得焉。雖聖人亦必不能云耳。讀之令人悲歎哀傷。五內欲裂。況身親爲之哉。際此時。唯一死快。當然而曰薄志節。今念死難則亦真情矣。故唯聖人乃能處死不以必死。勸人我願學者再三吟哦。則朝聞夕死何謂其不可也乎哉。

○書遺言後

以上原合爲一手軸。偶因朗目師父之便。錄出以寄焦漪老。并諸相知者一覽。則知余終老之槩矣。其地

最居高阜前三十餘丈爲余家。後三十餘丈爲佛殿。僧房仍于寺之右。蓋馬誠所所讀易精廬一區。寺之左。蓋李卓吾假年別館一所。周圍樹以果木。種以蔬菜。蔬園之外尚有七八十畝。可召人佃種。以爲僧徒衣食之用。嗚呼。死有所藏。安其身于地下。生有所養。司香火於無窮。馬氏父子之意。益如此。

○○棲霞寺重新佛殿勸化文

竊惟六度萬行。以布施爲第一。三毒五戒。以貪毒爲最。先蓋緣衆生。以財爲命。苟未能真知性命所在。則

財未易施也。佛憫此故。乃呼而告之曰。爾等當皈依
自心三寶。勿貪世寶也。何謂三寶。皈依佛。兩足尊。此
佛寶也。皈依法。離欲尊。此法寶也。皈依僧。衆中尊。此
僧寶也。三寶一心。靡求不應。故有能獻華供我。我知
是人。必能覩佛世界。坐寶蓮花。見佛成道。有能喜捨
一笠。我知是人。必能成就慧業。無始習氣。頓然冰消。
噫嘻。佛豈有誑語乎。人特不信爾。所以者何。蓋以因
果之說。尚未明了。輪迴之語。猶自生疑故也。夫因果
之說。種桃之喻也。種桃得莢。必不生李。種李得李。必

不生。莖投種子地。寧有僭乎。輪迴之語。因果之推也。
果必有因。因復爲果。因必生果。果仍爲因。如是循環。
可思議乎。由此觀之。報施之理。感應之端。可以識矣。
自種自收。孰能與之自作自受。孰能禦之。但捨一文。
決不虛弃。如其未曾請從此始。種德君子。當知所發。
心矣。棲霞寺任持僧清栢。舊曾謀于雲谷老宿。欲大。
新佛殿。未果。今平湖陸公。旣已發䟽募諸學士大夫。
人成斯舉矣。予復何言。不過發明因果大義。獨與一。
信心道人共結良因。爾異日金碧騰輝。照映山谷。

經聲自天而下。老穉扶攜。連殿三匝。拜舞歡呼。共祝
今皇億萬萬歲壽。十方讚歎。皆曰。某州某鄉某善男
子。善女子等。信施某某等。予知爾某等功德非細也。

○列衆僧職事

居山以念佛爲主。所有日用事。老成者自然向前力
作。不惜勞苦。但年少者。又皆係大衆徒弟。徒孫。非其
本師管束。不必樂趨不倦。以故坐食者多。用力者少。
則雖欲不廢弛。不得也。今常融旣與衆師父商議。分
定職守。自然清淨無事。可省頰舌之勞矣。然予又有

說焉。人衆既多。師父不一。師父若肯嚴束徒弟。不致偏護衆徒子等。見其師伯師叔。敬畏尤甚于本師。則自然一體爲善。決無參差。又居山田者。勞若十倍。大衆尤當敬畏。其念經領德。行著聞是。又山門之領袖。所謂僧寶者是也。外人聞之。而生信心。君子因之而生渴仰。本山得之。而加尊重。乃少年輩。全不加敬。是皆本師之過矣。苟不知此義。何可共任。卽此是地獄。種畜生業。不待他日。他年也。我山中老成者。原不如。此。但人衆既多。不得不預防。以申戒之耳。人多山小。

以後不許再接一个徒弟。徒弟孫果有聞風而來千里不遠者。我自能以師事之不悉。

○○追述潘見泉先生往會因由付其兒叅將

余向在白下門。因焦弱侯得交我見泉潘君。然僅僅數語耳。其得見泉之行事志節。則皆弱侯歷歷爲余道也。弱侯固樂道人善。然浮不得過二分三分。旣已親見見泉面。聆數語。則與弱侯言盡合。無半絲浮也。况二分三分乎。于是心中時時有一潘見泉。後余入滇。又三載得告謝。忽聞見泉來守北勝。余自謂得再

見我見泉。免心中時時有一見泉也。而君逝矣。作古人矣。嗚呼。見泉其真不復再見矣。後予遊方至楚。又聞其公子廷試。磊落奇氣。如見泉偶一夕。有一姓潘者。同一詹軫。光舉人。偕至湖上。見我。我留與一宿。至早欲別去。因問之曰。君是婺源。曾識潘見泉先生否。姓潘者立起。應曰。弟子名廷謨。是先君第四子也。予驚訝。卽起而嘔之曰。何不早道。使我得一夕歡喜。那爾。豈能飲酒。放歌。果是潘見泉之子。我當令人沽酒。盡村店。爾沈醉。不令爾一夜寂寞也。真拙人。真拙人。

胡不蚤告我。卽令僧雛打掃淨室。畱二人讀書。其中
月餘日。乃別去。時見泉三兒廷試。正弃文就武。將所
得其父精藝。發身遼左。侵侵乎見知于諸大老。勃勃
乎嚮用矣。聞其人全與父類。未面也。予乃戲廷謨曰。
爾與爾兄孰似。爾先人廷謨乃更謙曰。家兄得其似。
予小子不肖矣。予兄其推讓于兄。益使予又欲一見。
其兄。歲丁酉戊戌間。予復遊方至燕。晉而廷試在遼。
猶未得面。南旋至白下。聞廷試徙大同爲遊擊將軍。
官漸升矣。地益已遠矣。我益老終不得與廷試會矣。

豈知我仍復偕馬誠所侍御又抵潞河而廷試遂叅
戎于此終當一見也邪旣見廷試則大喜乃與廷試
索諸公所爲見泉先生傳誌等觀之大抵南溟汪公
誌極詳弱侯祭文及傳亦見交契總之未得見泉之
心也見泉之心我知之予時有一肚皮話欲對見泉
吐恨未同仍復吞之雖復吞食此話然終以見泉不
可不聞吾此話也何也世間丈夫若潘見泉者少也
非見泉固不必告以此話若是見泉又不可以不知
此話也戎此話惟見泉可使知之焦弱侯等雖相信

終不可告以此話也有可告之人而終不得告吾寧
不思乎吾謂若見泉者儻得與魯仲連蘭相如輩游
則其光明俊偉大有益于人國何如哉惜哉猶有酸
氣則以一種道學之習漸塞其天耳然時時露出本
色則以其天者全也今廷試其狀貌類父雄傑類父
而謙巽恭讓獨能委曲和說合乎上下之交則予之
恨不得與見泉言者今皆不必與廷試言之矣予寧
不大喜且爲見泉喜乎夫文武不同而忠孝則一倘
肯效忠盡孝何人不可何地不可何官不可況堂堂

國之叅戎與況通州京師門戶。虜騎突如其來。不待
信宿與有賢於此。

朝廷之上始可高枕而臥。豈可遽以和好自安妥也。
我

太祖高皇帝親置藩國于此。直塞口北之門於喉項
之間。

成祖文皇帝又親建北京於此。

聖子神孫百官萬姓。

宗廟陵寢與虜面隔一牆。如此其重也。而皆徑以付

興二三大臣與總兵叅將大將軍則見泉平生自負所欲爲而不得者今皆有兒以承之而又真能克承之我所欲言于見泉而不得者今廷試皆已了了又絕無俟予言然則見泉其真可以自慰矣見泉者佳公子喜讀書尤好武事不知在日曾與俞虛江戚南塘二老游不此二老者固嘉隆間赫赫著聞而爲千百世之人物者也今恨無此二老耳吾將以此二老者望于賢郎不知見泉兄以爲可否

○說法因由

萬曆庚子春正月人日山西劉用相設齋于興善禪寺適法師祖心在會余謂佛殿新興法師安于此講妙法華以落成之俾興善有勸非祖心不可也祖心許諾寺主續燈亦喜諾同與齋次有張南湖司禮慨然出米五十石以辦頭齋搶頭福也辛司禮願施十石次得福也皆孟司禮太監意也李卓吾聞而記之續有施舍不斷源源水來以畢講事唱揚道場今日辦齋于此真不虛矣祖心登壇講說法蓮華之日當率衆友來聽祖心其尚思妙法之難說哉余將聽焉

今日同會諸友若方時化汪本錡馬逢暘亦將聽焉
十方善男信士亦將聽焉務獅子吼無里狐禪則續
燈之意不虛張南湖諸公之意亦不虛矣是爲祖心
說法之由

○題孔子像于芝佛院

人皆以孔子爲大聖吾亦以爲大聖皆以老佛爲異
端吾亦以爲異端人人非真知大聖與異端也以所
聞于父師之教者熟也父師非真知大聖與異端也
以所聞于儒先之教者熟也儒先亦非真知大聖與

異端也。以孔子有是言也。其曰聖則吾不能。是居謙也。其曰攻乎異端。是必爲老與佛也。儒先億度而言之。父師沿襲而誦之。小子矇聾而聽之。萬口一詞。不可破也。千年一律。不自知也。不曰徒諷其言而曰已知其人。不曰強不知以爲知。而曰知之。爲知之至今日。雖有目無所用矣。余何人也。敢謂有目亦從衆耳。既從衆而聖之。亦從衆而事之。是故吾從衆事孔子於芝佛之院。

吳草廬曰義理玄微繭絲牛毛心胸開豁海濶天
高豪傑之才聖賢之學景星慶雲泰山喬嶽

草廬文公先生贊可以與文公並享兩廡矣。妙矣哉。
繭絲牛毛泰山喬嶽八字法也可謂最善名狀矣。夫
兩廡之享不享何関後賢事所患者以吾無可享之
實也使吾有可享之實雖不與享庸何傷祇不免重
增譏詆者之罪耳。然好譏詆者原不畏罪也。夫譏詆
者既不畏罪彼不與享者又不相関則恐泰山喬嶽
無以自安于兩廡之間而已。

○讀南華

南華經若無內七篇則外篇雜篇固不妨奇特也惜哉以有內七篇也故予斷以外篇雜篇爲秦漢見道人口吻而獨註內七篇使與道德經註解並請正于後聖云

○讀金滕

周公欲以身代兄之死。既已明告于神矣。而卒不死。何耶。然猶可委曰神不許我以死。我豈敢自死乎。我直以明我欲代兄之心云耳。非以祈人之知我欲代

見死也。則冊祝之詞。壇墠之設。珪璧之秉。金匱之納。何爲者哉。諺曰。平地上起骨堆。此之謂也。無風揚波。無事生事。一人好名。毒流萬世。卒使管叔流言。新莽藉口。聖人之所作。爲道學之所舉動。吾不知之矣。不有陳賈乎。陳賈曰。周公使管叔監殷。管叔以殷畔。知而使之。是不仁也。不知而使之。是不智也。此千古斷案也。不仁不智。從公擇其一者可矣。

○附史閣欵語

劉東星曰。歲辛丑夏。李卓吾同馬誠所侍御讀書。

山中余屢遣迎不至謂余官郎非遨遊之地官署
非讀書之場是以余爲不讀書也然余雖不讀書
余有祿俸可以養老不必皆何夷所樹也且余雖
曰仕宦而清素未脫寒酸氣習當與馬侍御等何
必分別太過乎且聞其病以好著述故病也老人
甚不立病可奈何所著何書指示我於是得史閣
二十一篇以歸其所敘述專以爲臣不易一語更
端言之極盡余因戲答之曰今人正坐不易一語
怠緩了國家大事使世界無所倚托今何謂出此

言也。動步不敢見勇往直前者則指爲輕進。動口不敢見開口見膽者則指爲干名。若皆慎重不易則斯世何賴。朝廷何賴。卓吾子勃然作曰。我爲上上人說法。不爲此等人說法。此等人乃世間患得失之人。賢者恥之。豈吾所說邪。我爲世間賢人多是如此。必欲進之於大聖人之域。文王孔子之歸蓋必如此。然後能濟事。然後能有益于君。此實載在尚書。著在周易。特無人提動不省耳。公看斯世誰不願爲文王孔子大聖人者。予聞之赧然愧遂。

卷四
卽梓行以布告天下。賢士大夫仁人君子使知其爲臣之不易。蓋如此云。

○○李卓吾先生遺言

春來多病。急欲辭。幸於此辭。落在好友朋之手。此最難事。此予最幸事。爾等不可不知重也。倘一旦死。急擇城外高阜。向南開作一坑。長一丈。濶五尺。深至六尺。卽止。既如是深。如是濶。如是長矣。然復就中復掘二尺五寸深。土長不過六尺有半。濶不過二尺五寸。以安予魄。既掘深了。二尺五寸。則用蘆席五張。填

下而安我其上此豈有一毫不清淨者哉我心
安焉卽爲樂土勿太俗氣搖動人言急于好看以傷
我之木心也雖馬誠老能爲厚終之具然終不如安
予心之爲愈矣此是予第一要緊言語我氣已散卽
當穿此安魄之坑未入坑時且閣我魄於板上用予
在身衣服卽止不可換新衣等使我體魄不安但面
上加一掩面頭照舊安枕而加一白布巾單總蓋上
下用裹脚布廿字交纏其上以得力四人平平扶出
待五更初開門時寂寂擡出到于壙所卽可粧置蘆

蕭之上而板復樁固以還主人矣。既安了體魄上加
二三十根椽子橫閣其上。閣了仍用蘆席五張鋪于
椽子之上。卽起放下原土築實使平。更加浮土使可
望而知其爲卓吾子之魄也。周圍栽以樹木。墓前立
一石碑。題曰李卓吾先生之墓。字四尺大。可托焦漪
園書之。想彼亦必無吝爾等欲守者。須是實心要守。
果是實心要守。馬爺決有以處爾等。不必爾等驚疑。
若實與予不相干。可聽其自去。我生時不著親人相
隨。沒後亦不待親人看守。此理易明。幸勿移易。我一

字一旬二月初五日卒遺言幸聽之幸聽之
聞之陶子曰卓老三月遇難竟歿於鎮撫司疏上
旨未下當事者掘坑藏之深長濶狹及蘆席纏蓋等
詎意果如其言此則豫爲之計矣誰謂卓老非先
見邪敬錄之以見其志

李氏續焚書畧卷之四終

李氏續焚書卷之五

詩彙

五七言古體

○捲蓬根

我來極樂國，便閱主人公。極樂主人常在舍，暫時不在與誰同。塵世無根若捲蓬，主人莫訝我孤蹤。南來北去稱貧乞，四海爲家一老翁。憶昔長安看花柳，如花人面今烏有。豈無易酒發朱顏，轉眼相看盡白首。竝時不見一人存，何況千年返舊村。風蕭蕭兮冢累累。

纍二十七年。今來歸。不道有烏丁令威。不道老翁竟
爲誰。但問主人是邪非。

○過桃源謁三義祠

世人結交須使金。黃金不多交不深。誰識桃源三結
義。黃金不解結同心。我來拜祠下。吊古欲沾襟。在昔
豈無重義者。時來恒有白頭吟。三分天下有斯人。逆
旅相逢成古今。天作之合難再尋。艱險何愁力不任。
桃源桃源獨蜚聲。千載誰是真弟兄。千載原無真弟
兄。但聞季子位高金多能。令嫂叔霎時變重輕。

五言古體

○張陶亭逼除上山既還寫竹贈詩故以酬之

我聞張陶亭。直似陶淵明。淵明求爲令。陶亭有宦情。
更有相似處。不醉吟不成。一千五百年。相看兩宿星。
俯視文與可。仰接顏真卿。機材萃於是。抱脚而長鳴。
柴桑饒古調。多藝羨陶亭。定有五男兒。賢于五柳生。
歲晚登黃山。言此是蓬瀛。我爲何病來。君胡自商城。
慙非白蓮社。誤作苦寒行。贈我七言古。寫君雪裡青。
古木倚孤竹。相將結歲盟。張三并李四。旣幸得同聲。

老病一相憐。遂得附驥名。

○哭承庵

我似盧行者。帶髮僧腰石。羨君強壯時。蚤知夕死迫。
獨買給孤園。性命共探贖。陽焰初升中。明然燭幽宅。
垢盡則明現。安在踐往跡。三夏久離居。二豎生肘腋。
一病不能支。旦暮成古昔。我爲擇交隘。君無衆寡擇。
衆愛自心寬。擇交常偏窄。君心何仁厚。我心何褊刻。
仁厚天所培。褊急天傾仄。君宜壽于吾。胡爲今反嗇。
吾聞木有根。長大蓋千尺。吾聞水有源。深厚著光澤。

茲事大不然。彼君固難測。忽忽年四十。遂爲遠行客。
縱能嗇君壽。詎能天君德。日聞羅浮江。勉勉真修慝。
一爲豫章行。叅訪恣所歷。學問苟如此。何憂不得力。
君今雖已矣。百世猶不惑。人生豈無涯。百年會有極。
而旣反其真。而我嗟何及。斯文太寂寥。古道罕從入。
悠悠天壤間。念我終孤立。

○○歌風臺

歌風萬古臺。猛士起蒿萊。四紀爲天子。又思猛士來。
欲飛無羽翼。特地令心哀。子房學辟穀。四皓出商雒。

今日歌大風明朝歌鴻鵠爲語戚夫人高皇是假哭

○登樓篇

是篇別楊生定見上人無念而作也楊母及其
室人俱深信佛乘故篇末及之

登樓不見予定知予已去此間相識人問予去何事
勢利不在予諸君何勸渠中有楊定見三載獨區區
心事如直繩孤立終不懼畏首復畏尾誰能離茲苦
但知道在吾不顧害有無上人稱具眼居士當何如
龐公難難難龐婆易易易會得無難易與吾同居止

七言古體

○贈段善甫

中州自古多才賢。去夏逢君汝水邊。君時讀書二百
里。我亦西行有半千。我寓接輿狂歌者。君家原種沈
丘田。五百里內賢人聚。一時談笑成偶然。暑退涼生
又進路。汝陽臺畔敞別筵。觀君意色殊悽愴。使我立
馬不能前。別來千里寒氷結。縱有南書魚不傳。梅花
寂寂仍含凍。誰知君亦上山巔。出門恰好逢君到。携
君入共主人言。主人別號劉晉川。樂道忘勢畏少年。

中原儒雅無君比，翹首願君急着鞭。

○○盆荷

四山寂寂雨綿綿，一盆之水菰荷鮮。終日走盤疑可弄，有時傾蓋喜相憐。飄蕭一似忘懷者，高潔真同不語禪。不用焚香煩首座，何須品色到西天。楊家有藕甜如蜜，精舍移根溉以泉。精舍彌天一月雨，楊家藕田空雲烟。誰知一葉兩三葉，反勝三千與大千。無心出水真如畫，有意凭欄笑欲然。妙處形容難得似，暗中摸索自相纏。初日徐看謝靈運，清水仍逢李謫仙。

杞菊新醪全未醒。茨菰相伴已多年。苗苗何時呈素面。芙蓉正看未花前。世間喜好君知否。不是繁華不着鞭。陶潛非是愛蓮客。慧遠虛拋買酒錢。曾似卓吾精舍裏。一盃之水亦清漣。將詩寄與萬人傳。

五言絕句

○客吟四首

昨朝坪上客。今宵雲中旅。旅懷日不同。客夢翻相似。

○其二

少小離鄉井。欲歸無與同。正是狎鷗老。又作塞上翁。

○○○其三

故鄉何處是。夏熱又秋涼。涼炎隨時變。何曾是故鄉。

○○○其四

乘槎欲問天。只怕衝牛斗。乘槎欲浮海。又道蛟龍吼。

○汝陽道中

日暮汝陽城。旅魂猶暗驚。六年今復來。又是一生平。

○觀音閣二首

觀音發大悲。欲作清涼王。如何古希人。不識三伏苦。

○○○其二

寂寂與僧閒。鍾聲曉漏間。綠陰垂釣者。問我何時還。

○ ○ 郭有道與黃叔度曾遇處

今我看碑來。郭黃安在哉。昔人分手去。此地起高臺。

○ ○ 琴臺二首

鳴琴人已去。琴臺猶在此。人今不復來。豈謂無君子。

○ 其二

君子猶時有。斯人絕世無。人琴俱已矣。千載起長吁。

○ 望海二首

望海不見海。海望歡聲起。順風而疾呼。通州二百里。

其二

海口望京師，山河起百二。龔遂至今在，倭夷安足慮。

哭貴兒二首

汝婦當更嫁，汝子是吾孫。汝魂定何往，皈依佛世尊。

其二

汝但長隨我，我今招汝魂。存亡心不異，拔汝出沉昏。

憶黃空人二首

今日知汝死，汝今真佛子。何須變女身，然後稱開士。

其二

我有一篇書。願言成佛事。時時讀一篇。成佛只如此。

○○初居湖上

雖無妻與子。尚有未死身。祝髮當搔首。遷居爲買鄰。

○○湖上逢方孝廉

白首澄湖上。逢君問故鄉。何期故人子。相見說高堂。

○○丘長儒訪予湖上兼有文玉

春風不掃塵。竹徑少行人。何自來君子。而猶現女身。

○○戲袁中夫

文章驚人手。傲世非丈夫。俠骨香仍在。埋頭好讀書。

○和丘長儒醉後別意

難逢是白雪。難別是相知。恨我不能飲。喜君真醉時。

○答袁石公八首

入門爲兄弟。出門若比隣。猶然下幽谷。來問幾死人。

○其二

無會不成別。若來還有期。我有解脫法。灑淚讀君詩。

○其三

赤壁賦。蘇公龍湖吟。白首君是袁。伏袁附君成四友。

○其四

江陵至亭州一千三百許尚有廣陵散未及其君語

○其下

別不說今朝去不說遙遙路逢進履者定知過圯橋

○其六

江陵一千三十里詩一函計程至君家百函到龍潭

○其七

平生嬾著書書成亦快予驚風日夜吼隨處足安居

○其八

多少無名死予特死有聲抵愁薄俗子誤我不成名

七言絕句

○○三日風

春來唯見北風多。豈謂清明節未過。莫以行人心事惡。故將風色苦磋磨。

○渡黃河

激浪奔雷萬馬追。黃河南出遶長圍。我今欲渡河東去。爲報天風且莫吹。

○到任城乃復方舟而進以待御也

明年三月濟寧州。老病相隨亦可羞。爲逐故人天際。

去何妨明月上方冊

○掛劍臺

丈夫未許輕然諾。何況中心已許之一死。一生交乃見。千金只得掛松枝。

○聊城懷古

十萬聊城一歲餘。魯生唯往數行書。誰言勝却百夫長。我道萬夫終不如。

○其二

千金若可當英賢。卿相亦當羈魯連。堪笑東西馳逐

者區區只爲一文錢

○讀杜少陵貳首

少陵原自解傳神○動鄉思便寫真○不是諸公無好

興○縱然興好不驚人

○其二

困窮拂鬱憂思深○開口發聲淚滿襟○七字歌行千古

少○五言杜律是佳音

○大同城

此城真與鐵城同○作者何人郭曉功○更有尚文周太

保至今說者猶悲風

○觀兵城東門

烏夷何敢動天兵。魚陣今看出塞行。若使仲由聞得此結纓。直下到王京。

○司馬誠所出臨濟閘

千艘萬舸臨濟州。閉閘開閘不自由。非利非名誰肯在。唯君唯我醉虛舟。

○彌陀寺

停舟欲問彌陀寺。正是黃蘗日上時。岸柳不知人意。

遠故牽白髮比青絲

○○輪藏殿看轉輪

亦曾思想出風塵
孟浪空嗟歲月新
今日法輪三度
轉依稀如見上方春

○○讀書燈

昔日貧儒今日僧
的然於世渾無能
瘦瓢倒掛三雲
樹肉眼頻觀古佛燈

○贈閱藏師僧

休誇繡閣圖遮眼
願尔頻繙到眼穿
若謂尋常難得

會慌忙急上遠公船

○○送思修常順性近三上人往廣濟黃梅禮祖塔
先瞻四祖理袈裟則往黃梅路不遐祖師若道傳衣
了千萬爲伊討佛牙

○讀李太史集

太史當今第一流文章經國賽騁驅傳聞久被豫且
制雲雨何時往見收

○○和韻十首

四大無依假此身。須從假處更聞真。風侵暑蝕非常

苦、苦、極、方、知、不、苦、人

○其二

與、道、彌、親、與、世、羣、天、空、怎、得、碍、行、雲、無、端、守、着、聲、聞、耳、不、道、觀、音、耳、不、聞

○其三

饑、不、喫、飯、困、不、眠、勞、勞、嚷、嚷、其、叅、禪、世、人、盡、作、奇、特、想、欲、就、空、中、覓、佛、仙

○其四

海、上、仙、方、無、數、新、按、方、治、病、總、難、成、會、知、無、藥、亦、無

病藥自輕投病始生

○其五

何因起竈又安爐。終日奔波走畏途。爲語貧兒休外走。家家自有夜明珠。

○其六

著意提防著意搖。天風吹動發真苗。試看自己身上光明藏。一點靈犀若爲銷。

○其七

唯有程程不耐看。六門休閉夜牕寒。早知夫網恢如

許放出樊籠。任意歡。

○○其八

滄海桑田幾變遷。深深海底好揚鞭。庭前梧子猶堪笑。笑却老婆亦解禪。

○○其九

誰道顏垣能禦寇。我知寇不上顏垣。不如牆壁俱推倒。贏得安閑與夢魂。

○其十

我說達磨正是魔。寸絲不掛奈予何。腰間果有雌雄。

剗且博千金買笑歌

○讀顧冲菴辭疏

文經武畧一時雄萬里封侯運未通肉食從來多肉
眼任君擊碎唾壺銅

○春夜

一簾疎雨坐終宵秉燭相看春已饒有話不妨人盡
吐五更鷄唱是明朝

○石潭卽事四絕

豈爲偷閑坐釣臺采真端爲不凡方神仙自古難逢

世且向關門望氣來

○ ○ 其二

十卷楞嚴萬古心。春風是處有知音。卽看湖上花開日。人自縱橫水自深。

○ ○ 其三

暖日和烟上碧樓。無情最是此溪頭。傷心欲問前程事。不肯斯須爲我留。

○ ○ 其四

若爲追歡悅世人。空勞皮骨損精神。季來寂寞從人。

謾祇有跡狂一老身

○○知命偈似蕭拙齋四首

命不在天不在仙。看君溥博似淵泉。從前醒却華胥夢。不到黃梁熟枕邊。

○其二

命不在心不在身。洗心何處覓真人。羲皇有畫不相似。一笑灰飛任暴秦。

○其三

命不名文不姓純。純文應已笑文孫。緝熙欲謝忘言。

者。穆。穆。徒。勞。費。口。唇。

○其四

命。不。曾。言。我。是。命。却。言。是。命。豈。真。乘。我。自。杖。頭。終。日。
掛。一。錢。不。復。問。君。平。

○因方子及戲陸仲霍二首

不。見。中。原。十。二。年。雲。泥。兩。路。各。依。然。鵬。鴉。自。有。青。雲。
侶。肯。向。人。間。問。謫。仙。

○其二

帶。髮。辭。家。一。老。僧。三。季。長。伴。佛。前。燈。歸。鴻。日。夜。敲。關。

終不到滇南不敢憎

○詠古五首

臥薪嘗膽爲吞吳。鍊面鎗牙是丈夫。嗟彼力能扛鼎者。拔山氣蓋竟迷途。

○其二

斷臂燬身未足誇。何當垂老問平華。須知一箭雙鵬落。始是封侯拜將家。

○其三

牧豕高歌滄海邊。舊川屢薦不稱賢。孰知真主虛懷。

日卽是公孫拜相季

○其四

李杜文章日月高。有身如許厭糠糟。由來造物難多取。但得時名氣自豪。

○其五

白頭老子不求名。道德千言萬古稱。今日若論真得失。此身曾是一流萍。

○感事二絕寄焦弱侯

永陵人去帝京遙。可是隋珠復暗投。昨夜山前雷雨

傳君一字到黃州

○其二

獨步中原二十秋。流光長射斗牛。豐城久去無人識。早晚知君已白頭。

○舟中和顧夢祥遺墨四首

柴濕煙濃淚滿襟。黃蘗不換古人心。自從涕唾成珠後。一色清光直至今。

○其二

酒瓢驢背看山好。兩斛舡頭亦看山。四海閒人今我

是爲君判醉出河間

○其三

白下人傳粉墨痕。虎頭千載復稱尊。我今暫撤西陵路。短髮長衫過石門。

○其四

鼎食公然不著忙。兵戈消日對愁腸。漁翁獨釣扁舟去。袖手輪竿臥夕陽。

○聽誦法華

誦經縱滿三千部。纔到曹溪一句忘。慚愧兒孫空是

大反將佛語誑衣裳

繫中八絕

○○老病如蘇

名山大壑登臨遍。獨此垣中未入門。病間始知身在繫。幾回白日幾黃昏。

○○楊花飛絮

四大分離像馬奔。求生求死向何門。楊花飛入囚人眼。始覺冥司亦有春。

○○中天朗月

萬里無家寄旅村，孤魂萬里鎖窮門。
舉頭喜見青天上一大團元，照覆盆。

○書幸細覽

可生可殺曾參氏，上若哀矜何敢死。
但願將書細細觀，必然反覆知其是。

○書能誤人

年年歲歲笑書奴，生世無端同處女。
世上何人不讀書，書奴却以讀書死。

○老恨無成

紅日滿牕猶未起。紛紛睡夢爲知己。自思懶散老何成。照舊觀書候聖旨。

○不是好漢

志士不忘在溝壑。勇士不忘喪其元。我今不死更何待。願早一命歸黃泉。

○○送汪鼎甫南歸省母

并序

丁酉歲余往西山極樂精舍而鼎甫復來京師與余相就。今爲歲壬寅六載矣。念有老母。余遂將歸。

時余病甚故書數語于此。使能復來而余能復在世則幸甚。使不能復來而余復不在世則此卷親筆亦實有卓吾子長在世間不死矣。可以商証此學也。世間無一人不可學道亦無有一人可學道者何也。視人太重而視己太無情也。視人太重故終日只盤旋照顧恐有差池而自視疎矣。吾子六載一意不微逐于外渾若處女而于道也其庶幾乎幸勉之幸勉之。

扶掖進子一登舟六載相從豈浪遊此去綠衣歡膝

下車來必定是新秋

五言律

○樓頭春雨

樓頭一夜雨。客歎主人誇。何意中州彥。能憐四海家。
白雲封去路。玄水薦新茶。我自出門日。知道有朝霞。

○觀漲

雨意獨悠悠。河頭不斷流。三辰猶滯此。幾日到神州。
踟躕橫渡口。才子上灘舟。身世若斯耳。老翁何所求。

○溫泉酬唱

有序

春日余同馬誠所侍御北行，路出湯坑，商城張子直舜選攜其甥盛朝袞，其小友陳璧侯，我于此連飲三日，然後復同往。從我者，麻城楊定見、新安汪本鈞，并諸僧衆十數人。從侍御者，僧通安與其徒孫，則自京師此可以見張與盛與陳之舅若甥與若小友之爲人矣。因爲溫泉酬唱。

大都天下士已在此山中，愛客能同調，相隨亦向東。
洗心千澗水，濯足溫泉宮。老矣無余奔，願師衛武公。

○八山得焦弱侯書有感五言二首

易感平生泪難忘故舊書三春鴻雁影一夜子雲廬
風雨深杯後杉松對我初開函如可見是夢者非歟

○○其二

海内存知己天涯若比鄰古人聊自遣此語總非真
問學多奇字觀書少斲輪何時策杖履其醉秣陵春
○○雨後訪段嚴庵禪室兼懷焦弱侯舊友二首

郡齋多暇日乘興一登臨雨過青山色僧歸綠柳陰
關河來遠夢明日隔同心爲有清風在因之披素襟
○○其二

伯牙去已久何處覓知音。獨有菩提樹。時時風雨吟。
興來聊倚玉老夫。欲抽簪。按劍投簪。壁甃高。感慨深。

○鉢盂庵聽誦華嚴并喜雨二首

山中聞勝事。閒寂更逃禪。竺法驚朝雨。經聲落紫烟。
清齋野老俱一食。此生緣千載。畱衣鉢。虛能白不傳。

○○其二

華嚴真法海。彼岬我先登。雨過千峰壯。泉飛萬壑爭。
山中迎太守。物外引孤僧。寄語傳經者。誰探最上乘。

○哭袁大春坊

獨步向中原。同胞三弟昆。奈何棄二仲。旅觀下荆門。
老苦無如我。全歸亦自尊。翻令思倚馬。直欲往攀轅。

○和壁間韻四首

但得菩提路。猶然是化城。黃鶯嬌欲語。百舌轉無聲。
天際花初落。水中月正明。身心安樂處。恨在最高情。

○其二

若論祖師禪。何勞說大千。野花朝滿徑。語燕晝驚眠。
水盡東南勝。山饒王謝前。狂呼絕叫去。或恐是飛仙。

○其三

一句阿彌陀。令人出愛河。謝公墩上草。王子竹前坡。
不用登山屐。寧容掩鼻歌。人生何太苦。三伏幾時過。

○其四

如何初夏日。毒暑便侵淫。地接清涼寺。人懷渴仰心。
風高番恨扇。樹密祇藏禽。豈是羣仙降。相將欲鍊金。

○中秋見月感念承庵

一死何容易。依稀四十春。他鄉今夜月。萬里可憐人。
客。泪。金。波。重。交。情。玉。露。新。人。琴。俱。已。矣。較。潔。爲。誰。親。

○○雪後

雪消人不到。孤客頗疑寒。冷眼觀書易。愁懷獨酌難。
至長知夜短。人老畏冬殘。應有同心者。呼童煮雪看。

○除夕李士龍至得吾字

百季今過半。除夕豈堪吾。不盡平生事。相逢有酒無。
歲去天將暮。燈明興不孤。故人來白下。爲我話東吳。

○○中秋月

飛鏡何團團。中秋自可觀。舉杯吞玉兔。探影得金丸。
肝膽千季在。清光萬古單。惟添頭白雪。頓減旅人歡。

○○中秋對月寫懷

萬里家山月。今宵擬醉看。一樽同見賞。百罰不辭難。
旅髻疑霜重。歸心生夜寒。無因來入夢。何以托金蘭。

○○清池白月咏似瀋國王二首

易降陪乘禮。難接大王風。照膽千秋鑑。觀心五蘊空。
清池懸曉日。白月映殘紅。所幸臨衰耳。聞聲猶未聾。

○其二

萬里無心客。三春碧殿風。龍鍾真可笑。躑躅已成翁。
玉笋來天上。金魚汎水中。誰知極樂國。卽在梵王宮。

○○獨坐

有客開青眼。無人問落花。暖風薰細艸。涼月照晴沙。
客久翻疑夢。朋來不憶家。琴書消永日。獨坐送殘霞。
○○偶遊

獨往真何事。尋芳病亦衰。園門隨杖屨。藉艸倚江洲。
好鳥知時節。當杯嘆客愁。歸來千載恨。盡付楚江樓。

○乍寒

初疑身似病。中夜起徘徊。炙炭敲生鐵。燒煤動死灰。
冰壺何日煖。水鏡爲誰開。亭亭坪上栢。知道歲寒來。
○○暮雨

一水翻江去。千山送雨聲。忽聽楓葉亂。始訝葛衣輕。
萬卷書難破。孤眠魂易驚。秋風且莫吹。蕭瑟不堪鳴。

○大智齋雨

人烟城外少。寂寂北樓居。風雨三更夢。雲山萬卷書。
有僧來問字。無力獨教鋤。八月南牕下。悠然余其余。

○雨甚

甲子無心記。懷人便問年。三秋度沁水。九月到西天。
倏忽前溪漲。淒涼萬樹懸。山中饒柿棗。飽噉是神仙。

○初雪

試看門庭雪無風故故輕登樓誰獨倚得句老還成
虛白真堪托非花不用名寄言車馬客此地卽蓬瀛

○至後大雪呼鄰人縫衣帶因感而賦之

獨有嚴冬雪能希遊子髯因風時到骨極目上鉤簾
不以西鄰好誰當一線添貧交誠足貴亦復令人嫌

○送馬誠所侍御北還

訪友三千里讀書萬仞山風來知日暖雨過識春寒
剪燭前牕叟寄身蕭寺間今朝柱下史實度老瞿曇

○初往招隱堂堂在謝公墩下三首

到來招隱處。暑病日相尋。地故稱江左。人猶似越吟。
輕風生細竹。初月掛禪林。謝公墩尚在。一眺便沾襟。

○其二

盡日阿蘭若。吾生事若何。白雲留客易。黃髮閱人多。
鳥爲高飛倦。墩因向晚過。無邊苦作海。曷不念彌陀。

○其三

初夏日遲遲。東山一局棋。謝玄臨陣戰。賭墅決便宜。
誰識清談客。能當百萬師。世儒多不曉。君子有餘思。

○寄方子及提學一首

何人獨我思天上故人而白眼誰能識雄心老自知
滇雲隨絕足昆海定新詩此方多俊逸長養報明時

○其二

爲郎憐白下秉憲憶南中一萬蒼山路三千魯國風
及門誰第一時雨迤西東聞有袞袞石何由寄遠公
七言律

○直沽送馬誠所兼呈若翁歷山并高張二居士
直沽今日賦將歸李郎仙舟亦暫違皓首攀轅慙附
驥青雲得潞正當時起鱸作寵須君事持鉢沿門待

我爲燕趙古稱多感慨而翁况復舊相知

○○顧冲菴登樓話別二首

知公一別到京師是我山中睡穩時
今夕生離青眼盡它年事業壯心知
簾外星辰手可摘樓頭鼓角怨何遲
君恩未答黃金散直取精光萬里隨

○○其二

惜別聽雞到曉聲高山流水是同盟
酒酣豪氣吞滄海宴坐微言入太清
混世不妨狂作態絕絃肯與俗爲名
古來材大皆難用且看楞伽四卷經

○望京懷雲中諸君子

翩翩公子下龍城，老別新知百感生。
回首不堪流水去，停鞭竊共遠山盟。
無情有恨終當死，晚節窮途哭不成。
他日若逢青眼客，定知劉孟入神京。

○薊北遊寄雲中歐江詞伯

老去何當薊北遊，況兼木葉又驚秋。
斷腸流水行人渡，絕域悲風塞草愁。
但有新詩長記憶，莫將舊事長沉浮。
知君正是龍門客，不羨當年李郭舟。

○○江上望黃鶴樓

楓霜蘆雪淨江烟。錦石流鱗清可憐。買客帆檣雲裏見。仙人樓閣鏡中懸。九秋槎影橫晴漢。一笛梅花落遠天。無限滄洲漁父意。夜深高詠獨鳴舷。

○又八月雨雪似晉老和之

霏霏颼颼笑羣兒。正是新涼暑退時。八月南方多載酒。葛巾紗帽坐彈碁。清秋或恐難爲抱。白髮應知慰我思。垓上故人如有意。陽春一曲莫辭遲。

○○○李見田邀遊東湖二律

不到西湖已十秋。興來沙越便杭州。眼前空濶烟波

冷天際微茫玉樹浮兩岸桃花飛小艇隔溪漁火宿
蘆洲行人本是遨遊客何況當年李郭舟

○○其二

湖上風多白晝陰水雲深處是禪林清歌一曲令人
醉銀燭高烧不自禁遊子他鄉雙白髮將軍好客千
黃金莫邪長劍終湏試未許扁舟獨鼓琴

○使往通州問顧冲菴二首

滇南萬里憶磋磨別後相思聽楚歌樓拱西山庭屨
滿尊空北海酒人多一江之水石城渡八月隨潮揚

予過今日中原思將相諸公無柰蒼生何

○其二

一、擲、曾、輕、百、萬、呼、良、霄、誰、與、共、驩、娛、人、來、但、囑、加、餐、
飯、書、到、亦、應、問、老、夫、已、約、青、春、爲、伴、侶、定、教、白、髮、
窮、途、請、公、更、把、上、蒼、禱、不、信、倭、夷、曾、有、無、

○○○宿天臺頂

縹、緲、高、臺、起、暮、秋、壯、心、無、柰、忽、同、遊、水、從、霄、漢、分、荆、
楚、山、盡、中、原、見、豫、州、明、月、三、更、誰、共、醉、朔、風、初、動、不、
堪、聞、朝、來、雲、雨、千、峰、閉、恍、惚、仙、人、在、上、頭、

繫中憶汪鼎甫南還

嗟子胡然泣涕洟相依九載不勝奇

連前三共九載

轉哭兒何去久係應添係永思生死交情爾
魂變化我須時纍纍荒耳知何處絮酒炙雞勿

李氏續焚書卷之五終